

दिनांक 12.01.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- प्रधानमंत्री नरेन्द्र मोदी कह्यो—युवा शक्ति बेगा ई भारत ने एक विकसित राष्ट्र बणावेला।
- राष्ट्रीय युवा दिवस रे मौके मुख्यमंत्री भजन लाल शर्मा राज्य रा 11 नौजवानां ने यूथ आइकॉन अवार्ड ऊं नवाज्यां।
- मुख्यमंत्री राज्य थर रा रूजगार उत्सव मांय 13 हजार ऊं बत्ती नौजवानां ने नियुक्ति रा पाना सूप्यां।
- प्रदेश मांय घणकरी ठौड़ां तेज ठण्ड रो असर बण्योड़ो है—आवता दो—तीन दिन कमती रा तापमान मांय और कमी आवण रा आसार।

000

प्रधानमंत्री नरेन्द्र मोदी कह्यो है के भारत री युवा शक्ति बेगा ई उण ने एक विकसित राष्ट्र बणावेला। आज नुवी दिल्ली मांय भारत मंडपम मांय विकसित भारत युवा नेता संवाद 2025 रे मौके बोलता वणा कह्यो के भारत री नौजवान ताकत उल्लेख जोग बदलाव लाय री है। श्री मोदी कह्यो के वां ने नुवी पीढ़ी माथे भरोसो है अर वां सगळी समस्यावां रो निराकरण खोज लेवेला।

प्रधानमंत्री कह्यो है के महताऊं लगस ने हासिल करण सारू देश रा हर रहवासी री सक्रिय भागीदारी अर भेळी कोशिश री जरूरत होवे है। वणा ई बात माथे ध्यान दिरायो के भारत बगत ऊं पैला केई हलकां मांय आप रा लगस ने पूरा कर रह्यो है।

प्रधानमंत्री कह्यो है के विकसित भारत आर्थिक, रणनीतिक, सामाजिक अर सांस्कृतिक रूप ऊं मजबूत बणेला। वणा कह्यो के लारला दस साल मांय 25 करोड़ लोगां ने गरीबी ऊं बारे निकाळी ज्या है। शुक्रवार ऊं सरू व्ह्या तीन दिन रो विकसित भारत युवा नेता संवाद ने नौजवाना ने विकसित भारत सारू अभिनव समाधान प्रस्तुत करण सारू एक अनूठा मंच दियो है। ई कार्यक्रम रे दौरान श्री मोदी देश भर रा तीन हजार ऊर्जावान नौजवान नेतावां ऊं बतळ करी। विकसित भारत संवाद नौजवान नेतावां ने देश रा भविष्य ने रूप देवण रा बारा मांय आप रा विचार साझां करण रे साथे नीति बणवण वाळां अर राष्ट्रीय अर दुनिया री हस्तियां ऊं सीधा जुड़ण रो मौको दियो है।

000

राष्ट्रीय युवा दिवस रे मौके आज जयपुर रा सवाईमानसिंह स्टेडियम मांय राज्य थर रो युवा महोत्सव व्ह्यो। महोत्सव मांय बोलता मुख्यमंत्री भजन लाल शर्मा कह्यो के विवेकानन्द नौजवानां सारू सब ऊं मोटा प्रेरणा स्रोत है।

वणा कह्यो के जिण मिनख रा मन मांय दृढ संकल्प शक्ति होवे है तो तैय है के आप रा सपना ने साकार करे है।

मुख्यमंत्री कह्यो के प्रधानमंत्री नरेन्द्र मोदी री अगुवाई मांय राज्य सरकार नौजवान महिला, किसान अर गरीब री भलाई सारु समर्पित व्हे र काम कर री है। ई मौके मुख्यमंत्री न्यारी-न्यारी श्रेणियां मांय ठांवे काम करण वाळां 11 नौजवानां ने **यूथ आइकन अवॉर्ड्स** दिया। मुख्यमंत्री युवा साथी केन्द्र रो वर्चुअल उद्घाटन ई कर्यो। कार्यक्रम मांय युवा मामलां अर खेल मंत्री कर्नल राज्यवर्धन राठौड़ मौजूद रह्या। वणा कह्यो के आपा रा देश अर प्रदेश रो युवां आप रो लगस हासिल करण सारु किण ई हद ऊं बध्यो नी है। जळसा मांय राज्य मंत्री के.के. विश्नोई अर सचिव नीरज के. पवन समेत केई ओहदादार मौजूद रह्या। वठे ई प्रदेश रा न्यारा-न्यारा शहरा अर कस्बां मांय स्वामी विवेकानन्द ने सिरधा रे साथे याद करी ज्या। अलवर मांय अशोक सर्किल माथे विवेकानन्द मूरत माथे पुष्प अर्पण कार्यक्रम व्ह्यो। बारां, चूरु समेत केई जिला मांय स्वामी विवेकानन्द जयंती माथे न्यारा-न्यारा कार्यक्रम व्ह्या।

000

राज्यपाल हरिभाऊ बागडे कह्यो है के वां ई शिक्षा सार्थक है जो पढ़ेसर री शारीरिक, बौद्धिक अर भावात्मक ताकत रो विकास करे। श्री बागडे आज जयपुर मांय विवेकानंद ग्लोबल यूनिवर्सिटी रा दीक्षांत जळसां मांय बोल रह्या हा। वणा कह्यो के विश्वविद्यालय पढ़ेसरां ने रुजगार रे लायक बणावण री बजाय रुजगार देवण वाळां राष्ट्र निर्माता बणावे। राज्यपाल कह्यो के विश्वविद्यालयां ने इण तरह रा व्यावसायिक कोर्स बणावणा चाहिजे, जिण ऊं पढ़ेसर पढ़ाई री बगत ई आप री इच्छा मुजब व्यावसायिक हुनर मांय माहिर व्हे सके।

000

युवा दिवस माथे आज जयपुर रा बिड़ला ऑडिटोरियम मांय राज्य थर रो रोजगार उत्सव आयोजित करी ज्यो। कार्यक्रम मांय मुख्यमंत्री भजन लाल शर्मा 13 हजार ऊं बत्ती नौजवानां ने न्यारा-न्यारा सरकार मेहकमां रा ओहदा माथे नियुक्ति रा पानां सूप्यां। अ नियुक्तियां चिकित्सा, वित्त, गृह, राजस्व अर शिक्षा मेहकमां मांय न्यारा-न्यारा ओहदा माथे करी ज्यी है। ई मौके राज्य रा न्यारा-न्यारा जिला मुख्यालयां माथे लगायी ज्या। रुजगार उत्सव कार्यक्रममां ऊं मुख्यमंत्री वीडियो कांफ्रेंस री मार्फत जुड़्या। उत्सव मांय बोलता मुख्यमंत्री कह्यो के राज्य सरकार नौजवानां रा हित अर रुजगार ने ले र केई फैसला कर्या है।

ई मौके मुख्यमंत्री 31 हजार करोड़ रिप्यां रा 76 हजार ऊं बत्ती विकास रा कामां रो लोकार्पण कर्यो अर नींव धरी। कार्यक्रम मांय उप-मुख्यमंत्री दीया कुमारी अर संसदीय कार्य मंत्री जोगाराम पटेल ई मौजूद रह्या। प्रदेश रा दूजा जिला मांय ई मुख्यमंत्री रोजगार उत्सव रो आयोजन करी ज्यो। पाली मांय प्रभारी मंत्री झाबर सिंह खर्रा रोजगार उत्सव री सरुआत करी। ई दौरान मौजूद लोगां मुख्यमंत्री रा भाषण ने वर्चुअल सुण्यां। उत्सव रे दौरान पुलिस चिकित्सा, वित्त अर शिक्षा मेहकमां समेत न्यारा-न्यारा महकमां मांय नुवां नियुक्त कार्मिकां ने नियुक्ति रा पानां दीरी ज्या। वठे ई हनुमानगढ़, जैसलमेर, झालावाड़, अलवर, अजमेर मांय ई आज रोजगार उत्सव रो आयोजन व्ह्यो।

भीलवाड़ा मांय व्ह्या उत्सव मांय उपमुख्यमंत्री प्रेमचन्द बैरवा नौजवानां ने नियुक्ति रो पानां सूप्यां। जालौर मांय मुख्यमंत्री रोजगार उत्सव रे दौरान 161 कार्मिकां ने नियुक्ति रा पानां सूपी ज्यां।

000

ऊंट महोत्सव

बीकानेर मांय चाल रह्या ख्यात नाम अन्तर्राष्ट्रीय ऊंट महोत्सव आज पूरो व्हयो। तीन दिन ताई चाल्या महोत्सव रे दौरान ऊंटां री न्यारी-न्यारी होड़ां समेत सांस्कृतिक कार्यक्रम व्ह्या एक रपट—

000

प्रदेश मांय लारला 24 घंटां मांय कठेई-कठेई हल्की ऊं मझलां दर्जा री बिरखा अर कुछ ठौड़ां ओळां पड़ण रा समचार है। आज केई ठौड़ां मझलां ऊं घणो कोहरो छायाी ज्यो रह्यो अर कुछ ठौड़ां सीळां ऊं घणो सीळो दिन ई दर्ज करी ज्यो। घणखरां जिला मांय कमती रो तापमान 10 डिग्री सैल्सियस रे आरे-सारे बण्यो रह्यो। सब ऊं कम 6 दशमलव 6 डिग्री सैल्सियस कमती रो तापमान जैसलमेर मांय रिकॉर्ड करी ज्यो। करडी ठण्ड ने देखतां पाली जिला मांय जिला कलेक्टर 13 अर 14 जनवरी ने सगळा सरकारी अर गैर सरकारी स्कूलां मांय कक्षा 1 ऊं 8 ताई पढ़ेसरां री छुट्टी ऐलाण करी ज्यी। उठिने जयपुर जिला मांय ई कक्षा 1 ऊं आठ ताई रा पढ़ेसरा सारू सगळा स्कूलां मांय काले छुट्टी ऐलाण करी ज्यी है। मौसम मेहकमां मुजब आवता 2-3 दिनां मांय कमती रा तापमान मांय कमी आवण ऊं ठण्ड रो असर और बध सके है। साथे ई मौसम केन्द्र जयपुर रा निदेशक राधेश्याम शर्मा बतायो के 14 जनवरी ऊं एक और आथूणी विक्षोभ रे सक्रिय होवण री आस है।

000

सैनिक स्कूलां मांय कक्षा छः अर नौ सारू होवण वाळी भर्ती परीक्षा सारू अर्जी देवण री काले आखरी तारीख है। आं परीक्षा **नेशनल टेस्टिंग एजेंसी-एनटीए** कानी ऊं देश रा एक सौ नब्बें शहरां मांय करायाी जायेला। परीक्षा देवणीयां परीक्षा सारू शुल्क चौदह जनवरी रात ग्यारह बजकर पचास मिनट ताई जमा करवा सके है। अर्जी मांय गलती सुधारण सारू सोलह अर अठारह जनवरी रा दिन तैय करी ज्यो है।

000

प्रधानमंत्री नरेन्द्र मोदी आकाशवाणी ऊं प्रसारित कर्या जावण वाळा खास कार्यक्रम **मन की बात** मांय ई दफा 19 जनवरी दीतवार ने विचार बतावेला। आकाशवाणी ऊं ओ कार्यक्रम दस साल ऊं बत्ता बगत ऊं प्रसारित कर्यो जा रह्यो है। ई महीना मन की बात कार्यक्रम री 118वीं कड़ी प्रसारित करी जावेला। ई सारू आप ई 17 जनवरी ताई मुफ्त नम्बर 1 8 0 0 – 1 1 – 7 8 0 0 माथे राय अर विचार भेज सको हो। ई रे अलावा 1922 नम्बर माथे घंटी दे र एस एम एस ऊं मिल्या लिंक रे जरिए ई सुझाव भेज्या जा सके है।

नरेंद्र मोदी एप या माई जीओवी ओपन फोरम रे मार्फत ई ऑनलाइन तरीका ऊं सुझाव दिया जा सके है।

000